

L' ORO AFFASCINA e CORROMPE

POESIA IN DIALETTO ROMAGNOLO

Sa cridissa d' contentev
a provarea ad' dimostrev
se iomne ad' prima e quei d' ades
is corromp per l' interes

Sè e progres, la ziviltà,
la religioun, l' umanità
al sparisc l' istess de veint
in confront dl' or e dl' arzeint.

Av zit un fat ca ne moderne;
varcordev si prim ad' st' governe
quand i quà ti nost paeis
e venn olta i Piemonteis?
da per tutt a sa stel piaz
urle, evviva, gran schiamaz!...
e pareva me senti
nissoun c' avess più da pati,
mi liberel pu specialmeint
clai fuss ande discretameint:
invec e fu tutt e contrerie
tenti povre volonterie
chià marcìe chià fat bataia
ià finì t' un pugn ad' paia;
qualchedoun i ne andè mel
ma queist i fu chi liberel
che mi prinzipie me progres
i preferiva l' interes!...
i politichent d' mestier...
queist ià compre qualch poder
i se allozzè discretameint
i magna, i bev e i sta conteint:
ma i patriott chiera convint,
siera ricch i n' ha più niint
o per l' Italia o per la zvana
i se arduitt tutt alla cana!

I pret ancora a ne l' istess?
quand es trata ad' fe interess?

Se voielt a iosservè
ai santri sol a cantè
fort, quand mor un possideint
ma se un puret l' incioda i deint
siv s' apresa per di dietre
a ni santi siè d' longh un metre!
e pu... se e mort le proprie un sgnour
a passè ei vo un pera d' our

tutt in fila come al ioch
ma sle un puvrett i dura poch!...

Crist la dett ca sem fradell,
a sem con lour ma chi sgabel
in tla cisa per preghè
na quand le ora da magnè
a sparisc la fratellenza
ognun pensa pla su penza.

Guasi tutt i quà te mond
da l' interes is fa confond,
se un le ste sempre un bon om
caritatevol, galantom,
se mett insein dl' or e dl' arzent
e diventa supte un prepoteint
un rospaz d' un usurai
che se po el ciapa tal tnaì
sei capitas encha e su ba
a cost d' mandel per carità.

Guardè donca sta moneda
quant robazi cla fa veda!

E pu, a no deitt ancora quel
tutt i fatt pu criminel
che suzzed te mond inter
chià rampi tutt al galler.

Ma iomicidie, i rubameint,
cherta felsa, fallimeint
più che perta ai temp d' ades
i ne caused d' all' interes?
Ma l' ira, l' odie di pareint
tra d' lour, se un le possideint
e cl' elt can na d' nissuna sorta
a ni brema sol la morta
e zprè mè ricch continuameint!
chei ciapas un azzì...!
(sempre e dis) che restass sech!
dur l' istess come un battech!
e perchè ei brema ten mel?
per ciapè te capitel...
Donca zenta guardè bein
quel ch' suzzed per i quattrein!

E fu abollid la schiavitù
personela cl' an iè più
che una volta av farò intend
i porteva iomne a vend

come ades al vach e i bu
che di padroun queist iera i su:
e venn la lezza d' Gesù Creist
e poch per volta ià proveist,
i n' ha portè mai più alla fiera
nissun om che quest l' è vera,
ma ades iaresta pu un en mel
l' om le sciev de capitel
bsogna che venga un ent sapient
a emancipel perfettament
si no quest sempre e sarà
sciev l' istess finchè e vivrà
e pu e sarà considered
sempre poch sle dispered.

À proposit d' sta questioun
a voi portev un paragoun...

Una dona la fa un burdel
bienchì e ross, robust e bel
per quant po conced natura
ma e puvrein .. là la sventura
d' nasc at chesa d' un purett
ca n' ha ne chesa a n' ha ne tett,
iamenca e pen per e pancot
perchè ei n' ha dielt set o ot
ech la vosa generela
cav la degh alla papela...

Oh!... si' andas, in Paradis!
(a santri che tutt i dis)
che fortuna che sarea
sei moreiss per cla famea.

Ma se nasc un fiol d' un sgnour
ammaled, senza calor
cl' è costrett a tribulè
chi dou de cla da campè!
che sarea fortunèd
se moriss appena ned!
cosa disle e popolaz
specialmeint tutt al donnaz!...
las che chempa pu e puvrein
e su ba la di quattrein
e po mantnein una tranteina
a crostein sera e matteina!

È prim... cle sen e cle robust
e che sarea più che giust
che campas per lavorè
che ma qualdoun e po giovè
no! le zpred la da mori
meda e mond la da spari!
e sgond puvrein cle difettous
e che sarà sempre dannous

per Lu e per ielt perchè sta mel
la da campè cla e capitel!

O ignorenza maledetta!
scapa un po dalla zucchetta?

Am dispies quasi da diil
ma bsogna cal digga però d' fil!

Oggigiorne in genere!
l' è lor, l' arzeint, e capitel
quel che conta più di tutt,
e per quest e mond le brutt!
quand l' ammenca l' ideel
cans disting e bein de mel
che dl' om la besa le i quattrein
a dvantam tutt assassein!
perchè l' om sa n' è more!
al ielt robì poc al vel,
a ragionè le tutt temp pers
la società la va travers!
a capisc ca la avri vesta...
i dis bein i socialesta
che sla fussa com i dis
e sarea un paradis...
ma per addes però chisà
sta riforma sla vnirà...

A speramm... che prest la venga
che ioperai quant le la dmenga
chi sa trova tutt insein
a magnè dou taiolein
in santa pesa in allegria
a te gremb dla su famea,
e can iammença i su quattrein
da compres e pen e vein
e quel che bsogna per campè
chi possa fni da tribulè;
e l' egoisme e l' interes
cle quel che guasta ai temp d' ades
se qualdoun l' aves ancora
a le... chil manda alla malora.

Quei di chemp e dla butega
chi s' unissa tutt in lega
e chis trata da fradell
e chi tira su i burdell
si prinzipie chi ne treist
come geva Gesù Creist.

Me a so vec sora i sentan
azzached da di malan
am so stuff da ragionè,
se qualdoun la vo comprè
no fe tent i complimeint
dem dies freuc ca so conteint.

G. VILLA